



Inatsisartunut ilaasortaq Ruth Heilmann, Siumut
 MAANI

Umimmaat pillugit Naalakkersuisunut apeqqu nr. 19-imut akissuteqaat

Inatsisartut suleriaasianni § 36, imm. 1 naapertorlugu Kangerlussuarmi umimmaat pillugit apeqquaqateqarputit. Apeqqu Naalakkersuisoqarfinit akineqartussanngortinneqarsimavoq.

Apeqqu:

1) *Ukiuunerani Kangerlussuarmi umimmanniarnermik ingerlatsisartut inuutissarsiutigalugu piniartut ukioq manna 300-iinnarnik pisassinneqarnerat sumit tunngaveqarpa?*

2) *Umimmaat neqaannut amiinullu tamakkiisumik tunisassiorneq qanoq pilersaaruteqarfigineqarpa?*

3) *Siunissami umimmanniarnerit imminut akilersinnaasumik kajungerineqartumillu ingerlanneqartalernissaannik Naalakkersuisut qanoq suliniuteqalersaarpat?*

Akissut:

Apeqqu 1-mut

Maniitsup eqqaani umimmaqassutsimut (Kangerlussuarmi) 300-nik pisassisoqarsimaneraanera paatsoornermik tunngaveqarsimassaaq. Ukiuunerani umimmannik piniarnissaq ammasuuvuq, tassa umimmaqassutsinit pisassiissutit qummut killilerneqanngimmata. Umimmaalli 300-t tunineqarsinnaaneri, tassaapput Arctic Green Food A/S-ip (AGF) ukioq manna Kangerlussuarmi neqileriffimmut tunineqartussatut aalajangiussai.

AGF privatinik pigineqartuummat Naalakkersuisut selskabip ukiuunerani piniar-nissamut tunngatillugu aalajangersaananeranut akulerussinnaanngilaq. Naalakkersuisulli AGF-imut kiffartuussinissamik isumaqatigiissusiorsimapput ilaatigut Kangerlussuarmi neqileriffik ilanngullugu, tassanilu qulakkeerneqarusussimavoq piniartut pisaminnik tunisisinnaanissaat. Isumaqatigiissummi tassani ilaatigut tunngaviuvoq tunisinikkut neqi 40 tons angullugu tigooraneqarsinnaassasut missangiunneqarluni.

Apeqqu 2-mut

Umimmaat neqaannut amiinullu tamakkiisumik tunisassiornissamut pilersaarutitut atatillugu erseqqissaatigineqassaaq suliamik sammisaqarneq tamanna Aalisarnermut, Piniarnermut Nunalerinermullu Naalakkersuisoqarfiup

J.nr. 01.28.10
 2. februar 2010
 Postboks 269
 3900 Nuuk
 Oq/tel (+299) 34 50 00
 Fax (+299) 32 47 04
 apnn@gh.gl
 www.nanoq.gl

suliaqarfianut ilaangimmat, tassa tunisassiassanik inerisaanerit akisussaaffiup iluaniingimmata, taamaattorli erseqqissaatigissavara Aalisarnermut, Piniarnermut Nunalerinermullu Naalakkersuisutut aalisartutut aamma piniartutut inuussutissarsiupeqarnerup inuussutissarsiutitut ineriartortinneqartuarnissaanut suliniutit pillugit tapersersuijuassagama. Taamaammat anguniakkatut siunertariuarpara siunissaq ungasinnerusoq tunaartaralugu naalakkersuisoqarfiit akomiminni tunisassiassanik pisunik pitsanngorsaatissatut aamma ineriartortitsissutaasinnaasunut sulianik ingerlatsinerit pillugit suliaqarusussuseqarama, taakuummatami tunngaviumik piniartut isertitaqaatigissasaannut annertuumik sunniuteqaataasinnaasut. Taamatut suliniuteqarnerit isumaqarfigivakka ilalersorneqaannartariaqartutut paaseqatigiilluni suleqatigiinnikkut ingerlatsinikkut.

Apeqquut 3-mut

Kangerlussuaq pillugu ingerlatsinissamut pilersaarusionermut atatillugu Naalakkersuisoqarfik aamma aqutsisoqarfik Kangerlussuarmi, Sisimiuni aamma Maniitsumi piniartut peqatigalugit oqaloqatigiinnerni peqataasimapput, ilaatigullu piniartut assartuisinnaanerinit aporfusinnaasut pillugit kissaatigisaannut tunngasunik naalaarluarlugit. Naggataatigut umimmaat piniarneqarsinnaanerit pillugu nalunaarusiami, nalunaarusiaq taanna akuersissutigineqassappat ammaassisoqassaaq umimmaat ungoorlugit piniarneqarsinnaanerannut periarfissiineq, taamaasiornikkut pisat naammassiuminarsarneqarnissaannut ammaassinerussaaq. Aammattaaq taamatut iliuuseqarnikkut piniarneq aningaasatigut iluanaaruteqarfiunerulissaaq.

Inussiarnersumik Inuulluaqqusillunga

Ane Hansen

Aalisarnermut, Piniarnermut Nunalerinermullu Naalakkersuisoq